

四庫全書

史部

欽定四庫全書

史部

欽定盛京通志卷七十八

少詹事<sub>臣</sub>曹城覆勘

總校官編修<sub>臣</sub>朱鈴

欽定四庫全書

欽定盛京通志卷七十七

國朝人物

十三

鑲黃旗漢軍

正黃旗漢軍



欽定四庫全書

欽定盛京通志卷七十七

國朝人物 十三

鑲黃旗漢軍

范文程隸鑲黃旗漢軍少穎敏沉毅讀書通大義  
初居瀋陽為明諸生天命三年來歸

太祖厚遇之日見親信叅帷幄天聰三年從

太祖征明入大安口下遵化進薄燕京明年還軍克永平灤

金史卷之七十七  
州諸城文程在軍中時預密畫五年攻圍大淩河  
城諭降明將祖大壽七年援明將孔有德來歸是  
時初設都統廷議首推文程

太宗曰朕特一軍職耳朕方資文程為心膂其別議之尋  
以文程為秘書院大學士

詔諭皆出其手文程每陳進取之策

太宗輒稱善入對必漏下數十刻始出或未及食息復奉  
召率以為常順治元年流賊李自成陷燕京明亡其將吳

三桂來乞師討賊文程力贊進兵且言自古未有嗜殺而得天下者國家誠欲統一區夏非乂安百姓不可傳檄示軍民悉令安堵如故大軍所至人心帖然迨入燕京凡建立規模多所裁定訂冊籍舉佚遺除明季重賦事無巨細應機立辦中原既定請申行鄉會試以致人材請興屯田以佐國用發保甲以杜亂萌事多施行文程嘗言天下治安惟在得人欲得人惟在惜才庶官中有一青不掩

者為湔除拔擢之人益感激効用故所奏舉莫不稱職先後以功晉爵至一等子

賜號已克什歷議政大臣充

太宗實錄總裁官加少保兼太子太保因病乞休特加太

傅兼太子太保聽解任調攝

賜以藥餌圖其像藏之內府康熙五年卒

聖祖再遣大臣致奠立碑墓道謚曰文肅五十二年

御書元輔高風四字顏其祠



佟圖賚一名盛年隸鑲黃旗漢軍先世居開原遷  
於撫順我

太祖克撫順其父養正挈族來歸以征遼陽功授三等輕  
車都尉世職尋駐鎮江城城守中軍陳良策叛降  
明將毛文龍養正被害長子豐年亦從死圖賚以  
次子襲世職天聰五年從圍大凌河破監軍叅政  
張春援兵以功晉二等輕車都尉崇德三年授兵  
部右叅政五年從圍錦州復白官兒屯臺六年復

從圍錦州取金塔口三臺七年攻松山城明將以  
騎兵奪我巨礮擊敗之又敗其步卒於山口分兵  
克塔山杏山諸臺乘勝下其二城論功晉一等輕  
車都尉擢都統八年從取前屯衛中後所二城加  
一雲騎尉順治元年偕都統巴哈納石廷柱招降  
山東四府七州三十二縣移師太原招降九府二  
十七州一百四十一縣二年從豫親王多鐸平定  
河南進征江南拔揚州敗明舟師於揚子江遂從

貝勒博洛下浙江攻克嘉興進爵二等男五年授  
定南將軍與都統劉之源討明桂王朱由榔於湖  
南時由榔將馬進忠等分據衡湘辰永沅勝臨寶  
慶圖賚擊之復其城六年鄭親王濟爾哈朗以大  
軍至圖賚別將兵趨衡州所向皆捷陣斬偽總兵  
陶養用破偽伯胡一清七營于城南連破之望公  
嶺山塔口一清竄全州又破其六營既下州城還  
師駐衡州遣將敗敵于石鼓洞斬其將二人八年

凱旋得

恩賞尋授禮部侍郎復調都統晉爵至三等子予世襲十

三年引疾乞休加太子太保致仕十五年卒

賜祭塋贈少保兼太子太保謚勤襄康熙十六年

聖祖追尊

孝康皇太后推

恩所生

特贈圖賚一等公以其子國網襲改隸滿洲雍正元年

追封養正一等公諡曰忠烈祀昭忠祠與圖賚並  
加贈太師明年

勅建專祠以祀圖賚

賜額曰功宗元祀

卽廷佐隸鑲黃旗漢軍先世居廣寧父熙載為明  
諸生天命七年征廣寧熙載率遼河西四堡兵民  
來歸授脩禦尋予三等輕車都尉世職廷佐其次  
子也崇德中以官學生授內院筆帖式順治二年

官國史院侍讀三年從肅親王豪格平四川六年  
從英親王阿濟格平大同誅叛鎮姜瓖是年遷秘  
書院學士十一年擢江西巡撫江西自明末洊遭  
兵亂逋賦鉅萬廷佐再疏請蠲緩以蘇民困土賊  
洪國柱繆我章等剽掠饒州廣信間遣將勦平之  
十二年擢江南江西總督校閱江南賦籍積逋至  
四十餘萬曰此非盡民困不能輸也必有官吏侵  
蝕之而詭稱民逋者民困可矜官吏之弊不可不

革覆覈之果盡得侵蝕狀而其弊相沿已久有司  
每視其所急以新舊賦互相抵飾愈糾紛不可釐  
治又令甲卒任徵賦未完者皆予降調去官屢更  
代吏益因以為奸以故逋賦日積廷佐乃籍之為  
三曰官侵曰吏蝕曰民逋專責右布政使分別督  
催而以新賦責左布政使鈎稽其收納俾不得相  
抵飾並疏請征賦未完應降調者令戴罪留任催  
徵以課實效於是宿弊頓為之革江南故無備用

船大軍經行皆取估舶以濟商賈頗觀望不前廷  
佐請視江西發帑造船備用江南之有備用船自  
廷佐始也十六年巡閱江海以海賊鄭成功方寇  
浙江沿海郡邑一揚帆即達江南而江南汎兵單  
弱水師未習舟楫未具請撥隣省勁兵以重海防  
部議以隣省無可撥者寢其事不行已而成功竟  
陷鎮江襲瓜洲犯江寧江寧兵少不足禦會副都  
統噶楚哈等自貴州旋師沿江而下廷佐與駐防



總管喀喀穆遜入城共擊賊挫其前鋒獲舟二十  
餘偽印二成功旋率衆大至屯于岳廟山連營八  
十有三艘腫蔽江廷佐等登陴固守及所檄援兵  
俱集遂與諸將定議以騎兵繞山後攻其背以步  
卒開神策門攻其前以舟師斷其歸路而令副將  
梁化鳳夜穴儀鳳門出銜枚襲偽總統余新營新  
就執成功已氣奪比旦前後兵並起來擊陣擒偽  
提督甘輝偽總兵張祿郭良玉縱火焚賊艘五百

餘成功遁入海捷

聞下

詔深褒獎之

聖祖即位分設江南江西總督二以廷佐專督江南康熙  
四年仍兼督江西七年以疾解任十三年逆藩耿  
精忠據福建叛

特遣廷佐為福建總督廷佐受

命發憤矢志殲賊上言臣孫娶于耿氏臣與精忠有連然

臣誓不與賊俱生願力疾前驅縛精忠歸獻闕下  
聖祖嘉之

賜鞍馬甲冑以寵其行廷佐至浙江賊已盡陷福建不得  
進乃從康親王傑書駐金華以禦賊十五年卒於  
軍

賜祭葬如典禮祀江西名宦祠

丁文盛廣寧人初為明諸生天命六年來歸隸鑲  
黃旗漢軍崇德三年任兵部啓心郎順治元年授

登萊兵備道二年擢山東巡撫濰縣賊張廣犯萊  
州遣將擊敗之於三埠又敗之紅山廣奔平度追  
及於徐里噶射殪之賊平文盛莅東省凡三年當  
兵燹後村落多墟乃專事安輯請蠲牙稅雜稅請  
肅郵政以節存經費市馬不得派累閭閻請清理  
刑獄請核臨清東昌平山諸衛兵虛額請裁虛額  
以重軍實皆下所司議行於是明季弊政釐革殆  
盡會莅平高唐禹城武城新城諸邑為土賊所擾

文盛請發禁旅勦之給事中林起龍御史金元楨  
交章責文盛不能弭賊部議當革職

世祖特寬之降授河南按察使六年遷福建布政使七年  
卒於官

劉之源隸鑲黃旗漢軍天聰中官叅領崇德中擢  
都統從圍錦州毀松山臺堡下塔山杏山二城攻  
拔中後所前屯衛屢以功晉一等輕車都尉世職  
順治元年大軍定燕京偕都統李國翰勦平畿南

餘賊尋偕都統葉臣勦偽伯陳永福於太原克其  
城別將兵徇汾州平陽斬賊四千餘山西悉平二  
年從順承郡王勒克德渾勦賊湖廣殲其黨於應  
山偽總兵馬進忠降復叛偕都統金礪敗之武昌  
奪其艘六十餘復追敗之湖泊進忠屢敗衄與賊  
渠袁宗第等先後降於明大學士何騰蛟並授偽  
總兵官分據湖廣諸郡邑五年以之源為定南將  
軍從鄭親王濟爾哈朗征之六年進攻湘潭騰蛟

勒兵三隊出戰擊之潰克其城生擒騰蛟乘夜進  
勦進忠平明薄其營拔之遂克寶慶連破其南山  
坡九營陣斬總兵馬有志胡進玉等進忠僅以身  
免乘勝擊宗第於洪江敗偽總兵王強于便水驛  
斬偽副將三人計級七百有奇前後叙功並遇

恩詔晉世職至一等男兼一雲騎尉八年偕都統金礪駐  
防杭州時偽大學士張肯堂偽侯阮進張名振等  
擁明魯王朱以海踞舟山之源與總督陳錦總兵

田雄會師由寧波出定海關進列戰艦以拒敗之  
橫水洋生擒進楊帆抵舟山薄螺頭門肯堂集城  
中兵六千堅守十餘日我兵以雲梯破其城肯堂  
及偽尚書李向中吳鍾岳偽侍郎朱永佑將軍劉  
世鄭左都督張名楊等皆死之名振擁魯王遁三  
盤島轉走沙埕之源遣總兵馬進寶等追敗之名  
振遂航海去乃與陳錦金礪奏設水陸兵三千分  
中左右三營駐守舟山以副將領之屹然為懸海



重鎮叙功晉三等子世襲罔替十六年授鎮海大將軍移駐鎮江既至以閩賊鄭成功方縱掠江海間而京口為東南輓輸孔道巡哨之法不具非所以重江防乃請練水師修戰艦飭火器募舵工慎分巡嚴會哨百廢具舉賊乃不敢犯明年獲成功所遣謀者乃得蘓松提督馬逢知與成功交通狀入告逢知伏誅康熙三年上疏請老

召還京仍任都統四年復乞休加太子太保致任八年內

大臣鰲拜獲罪之源父子坐黨附當斬

聖祖特原之之源尋卒二十年追復其官並

予三等子爵子光襲

胡有陞錦州人隸鑲黃旗漢軍崇德四年圍錦州  
有陞持道人崔應時書來約偕五十人以城降明  
將覺之盡害其衆因授有陞三等副都統八年從  
征明敗明兵於渾河又從克前屯衛中後所順治  
元年論功擢二等副都統五年以總兵出守南贛

值逆鎮金聲桓叛同偽建武侯王德仁來攻贛州  
有陞與巡撫劉武元竭力拒守閱五月糧盡士疲  
有陞拊循有素人無叛志尋王師大集急攻南昌  
聲桓北走有陞率諸將追擊大敗之是年九月廣  
東叛賊李成棟犯贛有陞復大破之累加至一等  
進秩太子太保康熙六年致仕贛人思其德崇祀  
名宦

趙廷臣鉄嶺人隸鑲黃旗漢軍明季居山海關性

至孝父歿三年獨居不入內室舉明經順治二年  
知江南之山陽縣時屢經兵火民多流散廷臣均  
徭緩賦民以安集丁亥歲饑廷臣損金糴粟計口  
賑之老弱者復按季周給多所全活土賊劉二虎  
與鄆寇王二虎攻山陽廷臣晝夜固守城賴以全  
其餘竊發山寇諭以大義多受撫又嘗率騎偵賊  
為所傷扶創歸益嚴守禦曰吾為國守於身何有  
山賊王希榮久據鎮安執掠縣令拘寨下臺司檄

廷臣往撫卽單騎至賊營宣布威德諭以禍福希  
營遂降廷臣因攜前令歸臺司咸器重之尋陞江  
寧同知民間有趙佛之稱十年大學士洪承疇經  
畧湖廣薦廷臣清幹素著十一年授湖南巡道兵  
民皆喜曰是趙佛來矣時軍需旁午廷臣辦治有  
方事濟而民不擾遇刑獄加意平反聽事但聞脫  
械聲行路為之感泣尤勵清操歲時餽獻不敢至  
其門十五年巡撫貴州時

王師甫定黔下車日廷臣延見父老博採旁咨盡得民疾  
苦狀凡所條禁洞燭幽隱定賦額興學校禁貪橫  
嚴騷擾種種寔政殘黎如出湯火晉雲貴總督兵  
燹荒歉之餘調劑兵民甚有恩惠加兵部尚書太  
子少保康熙元年調浙閩總督去之日士民擁道  
攀號者萬人在浙逾年勦撫浙東海洋餘寇斬賊  
帥張煌言寧台溫諸境遂安賊平恤軍愛民疏請  
復二十四監鼓鑄泉貨遂通廷臣性不喜繁侈每

賜祭葬謚清猷

行部不過數騎竟有不知其至者後以勞卒于官  
卽永清廣寧人隸鑲黃旗漢軍順治六年知山西  
渾源州時叛鎮姜瓖初平永清招集流亡詳請豁  
免逋賦萬餘兩十年知江西贛州府贛自丙戌城  
破復連歲用兵閩廣民多轉徙永清勤招徠嚴約  
束復業者日衆大軍之討李定國郝尚九也道經  
贛飼馬以行永清預度城南演武場為營柵芻糧

畢備而自往萬安迎大帥陳說郡當新定不宜騷動之故帥感其言下令不許一兵入城瑞金石城被寇害最甚為民營室廬廡嵒歲洊饑發粟往賑賴諸生王曰旦為盜所引不勝刑誣服永清廉其枉出之又雪興國民廖安民之獄在官四年賴人立祠祀之後歷山東按察使湖南布政使湖廣開藩南省自永清始也時干戈初靖永清招來撫育民得安堵永寶諸郡溪流悍急歲漕為艱力請



改折湘衡以南舊食粵鹽灘險道遠商民交病申  
請改食淮鹽至今稱便後擢山東巡撫士民追維  
遺愛建專祠撫臣趙申喬為記長子廷樞任粵東  
臬司有清望次子廷極歷任漕運總督卒謚溫勤  
肅起元隸鑲黃旗漢軍順治元年以貢生從入關  
承辦軍機事務多著勞績時畿輔初定授直隸大  
名守所至撫綏有方尋以僉都御史巡撫浙江一  
意撫戢與民休息杭嘉諸郡縉紳世僕不甘制於

舊主其主有哀落者諸僕借通海謀叛刼制之逼令開除出戶少不從則控之臺司逮捕其主株連甚衆起元廉得其情執干名犯分律置其僕於重典人心稱快時八旗駐防兵留鎮者與民雜處日久頗有齟齬起元於城西隅築城以居俾兵民判然不相驚擾十一年緣事降調旋卒起元在浙江十年功德甚多士民思之康熙元年請祀浙江名宦祠

靳輔祖籍遼陽隸鑲黃旗漢軍順治九年授國史院編修康熙九年屢擢內閣學士授安徽巡撫十三年逆藩吳三桂耿精忠等反分寇江西輔擒斬歙縣賊宗鑣等加兵部尚書銜十六年授河道總督是時河流橫決清口運道皆淤輔受事後斟酌事宜相度形勢興建堤埧廣疏引渠排衆議而不撓竭精勤以自効大挑山清高寶四州縣運河詳審兩淮全局陳經理河工事宜八疏復請開中河

三百餘里令漕艘由仲家莊牕而上即入中河避  
一百八十里波濤湍悍之險勞積茂著三十一年  
卒

賜祭葬諡文襄四十六年加贈太子太保予騎都尉世職  
輔治河十七年經理無不確當既老病劇猶疏陳  
兩河善後之策及請豁開河築隄廢田之糧沿淮  
軍民感誦治績不哀建詞河干著有治河方畧十  
二卷雍正十二年崇祀賢良祠

傳大受隸鑲黃旗漢軍世居遼東崇德六年聚衆於十三站時我師方圍錦州尚未掘壕一卒逃奔敵所大受執殺之并來報敵兵將犯駱駝山因遣兵往擊盡殲之授佐領世職順治二年從征江南攻克揚州又隨征浙江湖州賊黃蜚率衆來犯三敗之十三年從征舟山敗偽總制陳六御等之衆於海上以功累加世職至一等輕車都尉兼一雲騎尉

王繼文奉天人隸鑲黃旗漢軍順治元年授弘文  
院編修十八年分巡江西饒九南道時遣部員清  
丈蘆州頗作威福繼文日單騎走烈日中陰為調  
劑多所寬減民大感悅康熙十四年任雲南布政  
使贊理糧餉二十年大軍三路討吳三桂步騎數  
十萬米芻闕供議欲取食民間繼文白巡撫伊闕  
言於都統賴塔及固山貝子章泰等曰現糧可支  
三日如三日後米芻不繼請正繼文軍法乃急遣

員資銀分市隣邑未三日米芻飛至後巡撫伊闕  
卒遺疏薦遂撫滇賊平後招徠流民以漸復業尋  
擢雲貴總督惠政尤多卒贈兵部尚書祀名宦長子  
用霖任粵西臬司以廉明著

董應魁奉天人隸鑲黃旗漢軍初任良鄉令以賢  
能課最厯仕湖南寶慶守山東驛鹽道福建按察使  
廣西布政使皆有治行順治十八年巡撫廣東下  
車之日問疾苦懲積弊招携懷來民大安之時粵

屢遭兵燹瘡痍未復值靖南王耿繼茂移鎮閩省  
督糧甚急百姓騷動應魁慨然曰吾不忍誣罪於  
下請身任其咎遂左降部民懷其德立祠以祀

郎廷相奉天人廷佐弟也隸鑲黃旗漢軍順治十  
五年以郎中隨征偽晉王李定國有籌畫大帥多  
用其言以軍功加優叙康熙三年官四川布政使  
綏集流移給廬舍耕具營厰舍建學校兵火之餘  
百廢具興民不知擾尋擢河南巡撫遠近攀留者



遮道號泣十五年任福建總督時閩南初定餘孽  
尚熾廷相勦撫互用出奇制勝旬月之間沿海諸  
郡寇盜次第悉平又逆藩吳三桂遣偽將軍韓大  
任等由江右入寇廷相遣官詳諭利害大任感泣  
輸誠闔境帖然

丁思孔文盛子隸鑲黃旗漢軍順治壬辰進士初  
任弘文院庶吉士內國史院侍讀康熙八年授直  
隸分巡道出納平允吏胥不能為奸大軍內征供

億填謚思孔措辦有方毫不擾民十四年擢江南  
按察使旋陞布政使督臣于成龍疏薦二十二年  
擢偏沅巡撫修葺麓書院成二十七年湖廣裁兵  
夏逢龍因裁缺候補作亂副將傅爾學等應之叛  
踞武昌時思孔由河南巡撫調撫湖北籌餉充裕  
分兵勦擒賊渠授首擢湖廣總隸三十三年調雲  
貴總督卒於官

賜祭葬如例祀江南湖廣名宦

高承爵鐵嶺人隸鑲黃旗漢軍祖尚義順治元年  
從入關著有軍功子五承爵其第四子也康熙初  
由廕生授河南淇縣令屢擢至揚州知府以治行  
起擢江蘇按察使三十二年晉福建布政使蒞任  
三日即按之人文時盱眙泗州等州縣河流泛溢  
修築隄防全活無算三十九年再任值歲歉承爵  
損俸施粥皖人獲濟徵收錢糧革除扛耗奸胥歛  
跡尤加意學校振起人文四十年乞休還京卒祀

安慶名宦

范承勲文程子隸鑲黃旗漢軍由廕生授工部員外郎屢遷監察御史擢內閣學士康熙二十四年巡撫廣西時軍興之後餘糧數十萬部議全省折徵承勲酌徵半折半之法因地制宜民大便之二十五年任雲貴總督滇黔經吳三桂亂後庶事草創承勲至整飭營伍酌除重賦安輯邊隅盜息民寧又損俸修建學宮置禮樂器聘名士纂修通志

凡所規畫動中機宜二十七年尋甸左協營卒作  
亂省城弁兵欲應之約三更舉事承勲謀知其情  
命司更止打二鼓賊聞曉鐘始知事洩比曙叛黨  
咸就擒左協叛衆知事不成遁走交水承勲檄兵  
合擊盡誅倡亂者三十三年擢都察院左都御史  
承勲督滇十載屢勘大獄消兵變起瘡痍佈置周  
密巖輦固離滇之日兩省軍民環顧攀留極邊土  
司奔走千里泣拜載塗尋授兩江總督四十三年

以病乞休五十三年卒

賜祭葬祀滇黔兩江名宦祠

高其位鐵嶺人隸鑲黃旗漢軍父天爵於取精忠  
之亂殉節不屈死見忠節傳其位以蔭官佐領康  
熙十三年委署軍營叅領從靖寇將軍順承郡王  
勒爾錦出師襄陽征逆藩吳三桂命其位率二十  
騎覘虛實適賊將王惠率衆二萬人趨襄陽猝遇  
於土地領其位飛騎馳報而率所部出不意衝突

之賊驚潰且斫且馳至南漳越濠而呼入城守禦  
衣上血跡模糊刀及盡缺賊人圍南漳以城守守  
有備不能克解去又叛賊譚洪率舟師三萬向鄭  
陽其位以三百人扼楊溪鋪賊遙至其位踞崖射  
賊矢無虛發相持七十日糧盡煮馬鞍以食誓必  
死會副都統李麟隆擊破賊乃全師歸其位每戰  
先登前後給功牌十二副屢遷至湖廣提督調江  
南提督兼攝總督事雍正元年晉大學士太子太

傅兼禮部尚書五年卒

賜祭葬諡文恪入祀賢良祠

高其倬鐵嶺人隸鑲黃旗漢軍康熙甲戌進士由翰林屢擢至內閣學士奉使勘打箭爐疆界瓦斯  
訾服及還圖其地形以進康熙五十九年擢廣西  
巡撫旋授雲貴總督勦平中甸及仲家苗叛黨威  
望大著畚境乂安兵民樂業雍正初調閩浙總督  
甫抵浙聞閩省歲祲即奏請截江浙漕米二十萬



由海運平糶賑濟復奏請發帑採買廣儲備禁囤積民不病飢性明恕政舉大綱不矜苛細遇屬員有恩禮其清節尤著一時七年調兩江總督旋晉工部尚書轉戶部尚書乾隆三年卒諡文良

佟國正撫順人隸鑲黃旗漢軍順治初由州牧累擢至監司康熙十四年擢江西巡撫時吳三桂反提督嚴自明等從逆率賊逼南康國正率將士破其營十七斬首萬餘明年招撫賊張元仁等降其

衆十七年偽總兵賴榮盤踞江廣間九鄉地方出沒為寇國正撫降之賊將韓大任等竄走萬安敗之鷓鴣灘諸處多斬獲以功累加至兵部尚書國正潔已率屬禮賢下士賞罰必信摘奸如神勸農桑恤閭閻每有調發不驚部屋撫民之流離者分置附郭選其丁壯暫令隨征難民皆得安堵十八年致仕尋卒崇祀江西名宦祠

梁應元遼東人隸鑲黃旗漢軍順治六年知江南

池州府為政恒視民所急首葺學宮振拔寒峻優  
以次修舉廢墜百度俱舉遷隸大名道去民為立  
祠

王之佐隸鑲黃旗漢軍世居廣寧康熙初任寧化  
令時海氣未靖二十年王師十萬駐漳州日餉十  
斛上游飛輓派役民夫之佐念民疲差重設法調  
劑隨時補救以蘇民困會有黃機者受吳三桂偽  
劄脅其鄉黨從逆楊地一鄉不從遂圍而屠之

佐請兵會勦時大軍與海相持難以驟移之佐力  
請於督撫調三鎮兵會勦值同安告急督撫有難意  
之佐言不可驕賊以致民人糜爛聲淚交迸督撫  
鑒其誠許之之佐遂部率鄉兵躬為嚮導蹙賊壘  
分攻之賊盡棄其衆越賴石入江西投誠江西撫  
臣納之發符還寧化之佐堅不奉檄昌言於大吏  
曰閩賊即江賊也若閩賊入江即當宥死江賊入  
浙又應偷生王法將誰加乎如謂法外宥過以招

不廷則自江納之即自江用之今名寄江籍而身  
返閩巢閩之文武何顏臨之乎大吏是其言遂搗  
其巢穴以兵截洞口絕其歸路賊遂氣沮黨類星  
散之佐戮力行間每領兵數千旦夕巡視營壘聯  
客師為指臂市井肅若無人後以勞得寒疾卒軍  
民罷市巷哭者三日崇祀本縣名宦祠

佟國楨奉天人隸鑲黃旗漢軍順治中知江南之  
無為州瀕江田廬恃壩捍蔽三壩將圯國楨自鮑

家橋至周思溝築堤四千丈有奇名四壩後三壩傾而田廬卒無恙闔境居民無不欣躍其居官儉約恒以清節自勵一時翕然稱為良吏

于宗堯廣寧人隸鑲黃旗漢軍康熙七年年十九以蔭補常熟令勇於為治興利剔弊雖老吏勿能及邑素苦於漕宗堯視事三月盡除其害三年卒於官邑為罷市男女巷哭醵金治其喪負版者皆投一錢樞將歸百姓遮道留之葬虞山南麓題其

阡曰萬民留葬邑人瞿式鼎捨宅為祠在慧曰寺

西

趙良璧開原人隸鑲黃旗漢軍康熙八年知山西  
徐溝縣邑當孔道民苦供億良璧送迎餽獻胥絕  
不以絲毫累民莅政五年寬嚴並濟以清源盜案  
畢誤去邑民為立生祠以祀

許宏勲遼陽人隸鑲黃旗漢軍康熙十三年知浙  
之紹興府耿精忠叛於閩諸暨新城嵎縣三邑奸

民嘯聚圍攻郡城宏勲乘夜率兵出斬其渠魁餘  
悉撫諭散遣之郡境又安二十五年任按察使持  
法剛正無所屈撓二十七年楚北兵譁奸人張麻  
子等思乘機為變期以三鼓竊發宏勲偵得其謀  
亟白之總督戒譙樓鼓徹夜無三搗密捕亂首十  
數人無得脫者比明已斬首轅門兵民帖然人服  
其智

盧燦海城人隸鑲黃旗漢軍康熙中任浙之龍游



縣時浙東盜賊充斥燦勦撫並施羣匪斂迹四境  
獲寧在任八年愛士勸農厯著善政卒於官祀名  
宦

朴士秀奉天人隸鑲黃旗漢軍康熙四十年知  
河南確山縣聽訟明決無留牒革除火耗及一切  
厲民陋規創建義學督課生徒士民咸頌其德

張綏遠奉天人隸鑲黃旗漢軍祖必科見忠節傳  
康熙四十一年綏遠知廣西思安府歲歉損資賑

濟疾疫設醫局療治之又令家人遍歷郊野有暴露之棺無主者即為掩埋其有主勸令速葬郡治半屬土司廣建義學延師訓導由是夷俗漸知禮義憬然嚮化

正黃旗漢軍

吳景道廣寧人隸正黃旗漢軍

太宗時以諸生考擢吏部啟心郎都察院理事官疏劾刑部理事官郎位受賕不法狀鞠實黜郎位為民順

治二年授河南布政使尋擢巡撫河北初定河南  
五府餘寇未靖景道檄總兵高第等勦宗養氣於  
寶豐陳蛟於新野黃景運於商城並捕斬之四年  
勦陽賊黃廣泰犯浙川遣總兵張應祥等擊卻之  
五年遣都司朱國強等勦羅山賊張其倫破其鷄  
籠山寨執其倫伏誅是年山東賊范慎行踞黃河  
北岸剽剽開封歸德諸屬邑復檄高第勦之賊敗  
走長垣蘭陽退據曹縣乃簡精騎分道出胙城東

明張左右翼合覆其巢殲其衆數千遂縛慎行梟  
諸市以功加兵部右侍郎七年晉尚書八年陝西  
商州賊何柴山犯盧氏遣張應祥撲滅之境內悉  
安十年以老疾致仕

特恩加一級蔭子入監十三年卒年七十有五

賜祭葬贈太子太保諡懿僖祀河南名宦

雷興遼陽人隸正黃旗漢軍

太祖定遼東興以諸生選直文選

太宗設科取士興中式舉人授秘書院副理事官崇德元

年

特試內三院學士舉人生員興名列二等得

恩賚尋任都察院理事官順治元年擢天津巡撫時土賊

李聯芳張成軒嘯聚滄州南皮間興偕總兵婁光

先督師進勦聯芳等走遁窮追至海口過其旁軼

賊投水死者大半餘悉縛之以歸遂斬其渠散遣

脅從者歸農賊平因疏請設戰船於大沽海口以

備海防從之二年遷陝西巡撫陝地當流賊擾亂  
後城郭空虛戶口凋耗榛莽塞原野興招流氓關  
無田拊循綏輯與民相休養關中乃稍實

世祖聞而嘉之屢

賜冠服裘馬以旌吏治三年流賊孫守法等掠興安叛鎮  
賀珍掠漢中興移潼關兵三百駐商州以扼守法  
檄漢羌道胡全才同城守以禦珍會肅親王豪格  
西征張獻忠道出陝西擊走珍守法亦遁去興以

隴州為河西咽喉西安藩蔽山險林深易於藪盜  
臨洮鞏昌於西番為隣並請設兵分屯要害下所  
司議行四年以疾致仕十年起授河南巡撫未至  
任卒

賜祭葬如例贈兵部右侍郎廕一子入監祀陝西名宦祠  
王來任奉天人隸正黃旗漢軍天聰八年漢書舉  
人崇德元年授工部啟心郎屢官至大理寺少卿  
康熙元年以副都御史撫治鄖陽四年巡撫廣東

時粵中屢經寇盜軍民未安來任抵任撫集流亡  
詔詢疾苦復疏陳六大害力請禁革平反積案固  
圉一空常微服遊市間察有司淑匪兵廝橫暴嚴  
捕重懲邊疆綏靖嗣卒於宦祀名宦

金維城隸正黃旗漢軍總兵金玉和子也崇德元  
年大軍征錦州維城以叅領督饋餉五年以副都  
統從圍錦州明兵突圍出戰擊卻之先後攻克其  
臺十八屢敗松山杏山援兵七年錦州下移師攻



克塔山杏山城以功授雲騎尉世職兼任兵部叅政駐防錦州八年從政天平克中後所前屯衛二城晉騎都尉順治元年定燕京改六部叅政曰侍郎維城仍任兵部侍郎五年從鄭親王濟爾哈郎證明桂王朱由榔於湖廣六年攻克湘潭趨寶慶敗其總兵馬進忠王進才袁宗第等追勦至武岡沅州靖州俘斬無算七年凱旋得

恩賚累加世職至一等輕車都尉十年坐失察屬吏受賕

免官降世職為三等十五年卒長子世需襲次子  
世礪康熙間屢立戰功十八年勦海賊劉國軒於  
漳州陣沒贈雲騎尉入祀昭忠祠

李恒忠隸正黃旗漢軍事

太宗為侍衛

賜名宜哈納初任佐領尋進叅領崇德八年從攻中後所  
前屯衛二城予雲騎尉世職順治元年偕都統葉  
臣征山西攻克太原汾州及文水城三年從征四

川敗流賊楊薦兵於馬湖五年擢副都統六年偕  
都統巴顏駐師西安屢敗流賊孫可望劉文炳康  
薦宗等殲其衆十一年明桂王朱由榔遣其將李  
定國犯廣東偕靖南將軍珠瑪喇往禦之敗定國  
於新會晉世職一等輕車都尉康熙十三年第三  
子儀祖襲

戴都隸正黃旗漢軍本姓李名獻祖思忠姪也初  
任佐領天聰二年圍錦州以巨礮克臺堡有功崇

德六年從圍錦州又攻拔塔山杏山附近各臺敗  
明兵於長安嶺八年從克中後所前屯衛二佐領  
順治元年隨征太原克其城十一月隨南征破流  
賊滅福王平定河南江南克武岡山寨及揚州嘉  
興江陰三城論功最九年克成都降偽王劉文秀等累  
加世職至三等男

馬汝龍隸正黃旗漢軍襲魁父應備禦職天聰二  
年從征明圍錦州克屯臺及塔山杏山城俱有功

崇德七年隨取前屯衛中後所順治元年以叅領  
兼刑部理事官擊流賊于潼關二年克武岡山寨  
揚州等處獲敵船於揚子江敗偽總兵黃蜚之衆  
進克江陰論功加佐領六年從征逆鎮姜瓖取渾  
源州等五城十四年以副都統駐防福建入為刑  
部侍郎累加世職一等輕車都尉康熙十六年卒

賜祭葬

張尚寧遼州人隸正黃旗漢軍

太祖定遼來歸崇德三年任戶部啟心郎以稱職列優叙  
順治十二年擢福建右布政使時海氛甚熾臨漳  
州泉豐以南震動大軍進勦資糧供頓日費數十  
萬錢尚督餉無匱監造巨礮攻具往來海上親冒  
矢石備歷險阻卒復漳州遷左僉都御史巡撫甘  
肅卒於官閩人思之祀名宦祠

張國用世居廣寧隸正黃旗漢軍順治五年貢士  
康熙十四年任河南浙川縣循良正直勤於撫字

會逆藩吳三桂之亂供應軍需不累百姓去任後  
士民感頌祀名宦祠

李蔭祖鐵嶺人隸正黃旗漢軍父思忠招集鐵嶺  
等處戶口來歸以軍功授子爵蔭子與兄顯祖皆  
以功名著順治五年由廕生授戶部郎累官左僉  
都御史十一年授直隸山東河南總督加兵部尚  
書疏請豁被災州縣秋糧安集流民及直隸頻海  
設汛安營稽查海船出入事宜皆議行時真定西

山久為流寇擾據蔭祖諭井徑道副使陳安國入賊巢撫之渠賊高鼎涕泣就撫卒為勇將三年晉太子太保總督湖廣軍務值大軍進勦滇黔蔭祖區畫有方兵民欣躍在任四年以疾告歸卒

賜祭葬祀直隸山東河南湖廣名宦

紀國相開原人隸正黃旗漢軍順治元年知河南輝縣當流寇破殘之後百姓凋瘵邑境荒涼國相修治城隍招撫流散勸開墾給耕具通商賈設學



校與民更生甚著能績及卒祀本邑名宦

線縉廣寧人隸正黃旗漢軍順治二年守山東曹州時定鼎之初餘寇流毒未泯縉治尚簡易勸開荒地歲不下數百頃無力之家助以牛耕民始得耕嚴飭保甲諭令守望相助後土賊竊發隣境梟杙而曹獨獲安調守河南汝寧時值亂後郡無太守者數年初下車城中居民不滿數十家縉省刑薄賦與民更始有安堵之樂累遷司道並有能聲

四年擢偏沅巡撫五年偽貴溪王朱常澂等勾連  
苗賊分寇沅州縉同線安國等會兵進勦攻下永  
寧猶常山及諸賊渠斬之在任三年緣事落職尋  
卒曹人思其功德崇祀名宦

張所志奉天人隸正黃旗漢軍順治十七年巡按  
四川時土廣人稀道路榛莽所志招輯流移各令  
安業疏陳收拾全川事宜章數上多見採納康熙  
十二年任山西驛糧道以廉介為屬吏倡及護藩

篆令自封授樞地方便之後陞福建按察使遇寬  
獄立為昭雪時用兵海上所志督造船艦趨運軍  
需不辭勞瘁以功擢江西布政使大有政聲

朱思義義州人隸正黃旗漢軍順治元年任浙江  
巡道僉事時浙江初定將驕卒縱思義莅官風裁  
卓立嚴懲告訐之風兵皆戢斂民得安堵後卒於  
官人皆惜之祀浙江名宦

張弘猷奉天人隸正黃旗漢軍順治中知湖廣長

沙有肆應才雖事起倉卒處以鎮靜臂畫咸中不為撓奪當軍興時公務旁午一切簿書皆手自裁定為政嚴明而不苛民皆稱之

劉國寧奉天人隸正黃旗漢軍順治中知湖廣黃岡縣邑當水陸要衝徵發接踵國寧長于肆應事集而民不擾縣多火患預投撲滅諸具有警輒身先往救遂不成灾政尚寬簡民俱戴德卒祀名宦李輝祖恒忠長子隸正黃旗漢軍康熙十三年擢

郎中十九年遷貴州按察使二十一年授四川布政使川省經吳三桂亂後田多荒蕪輝勸民開墾生聚日盛按畝征賦釐奸除弊民以為便歲貢蠲料棧道險阻民多以為病輝祖力請於巡撫奏罷之三十四年授河南巡撫尋擢湖廣總督卒祀四川名宦

李興祖隸正黃旗漢軍宜哈納子輝祖弟也初任直隸慶雲令康熙二十四年擢山東兗州捕盜同

知地為山東江南兩省扼要時土寇李二和尚餘孽尚不靖興祖蒞任曉諭居民能擒賊者賞能自新者即免罪不一年餘黨盡除在任三年多方巡察恩威並濟兩省所屬人民悉遵禮讓奸宄哀息迨攝篆沂州清廉惠愛咸頌仁明尋擢直隸河間守累官江西布政使順天府丞卒究人思其德崇祀名宦

李鈞蔭祖子隸正黃旗漢軍由刑部郎中屢擢至

兵部侍郎康熙三十五年

聖主親征噶爾丹與左都御史于成龍等督運中路軍糧  
出古北口奎素沙深陷轂令士卒伐柳枝橫藉沙  
面車得前進至克魯倫河復

命轉饟赴西大路將軍費揚古軍凱旋叙功加四級三十  
七年授山東巡撫尋以疾辭未赴調安徽巡撫蒞  
任後戢兵安民緩征息訟立義學義倉又造江船  
以拯溺修橋以利涉雖履任未久而遺愛甚多四

十二年卒於山東賑所

楊廷耀遼東人隸正黃旗漢軍康熙初任粵之梧州通判土賊唐三變等屢敗官餉四出剽掠廷耀捕斬其渠盜患遂息分權梧關稅判定稅貨則例按往來船戶人給一紙吏役乃不敢苛索署容縣事僞晉王李定國餘黨竄踞大榮山連結猺獞為寇廷耀以計擒斬之賊黨四散遠近寧帖時稱能吏王育賢奉天人隸正黃旗漢軍康熙中任福建興



泉道海寇圍泉州育賢日夜為戰守具與士卒登  
陴守禦不解甲者十餘年日徒跣築垣躬操撻挿  
聞援師將至單騎自臨衢巷徧慰父老民皆感激  
流涕尋以勞瘁卒泉人設本主於崇陽樓祀之

常光裕奉天人隸正黃旗漢軍康熙中知湖南靖  
州地當逆藩吳三桂擾攘之後光裕招集流離靖  
方撫字民不失業三十四年擢知泉州府為政安  
靜聽斷詳明為晉江縣民黃姓力正主僕名分闔

郡稱快其他摘奸發伏申寃理枉率多類此

李鐸鐵嶺人隸正黃旗漢軍康熙中知浙之紹興府會餘姚大水漂溺民人廬舍鐸與知縣康如連煮糜以賑編筏以居又念就食妨業復按各縣鄉里民籍人給米四斗幼者半之製絮衣與寒者全活無算在任四載始終不名一錢

閻璋廣寧人隸正黃旗漢軍康熙中知湖廣靖州州境利弊璋革重耗禁派累創義學勸課農桑民

漸樂業土寇吳旦先犯境身先陷陣擊斬無算寇遁去復追殲之合治懷其德

劉有成奉天人隸正黃旗漢軍康熙三十年任山東壽光縣精敏長於吏治邑民素刁悍健訟又好藉勢侮貧弱有成以嚴明馭之境內肅然時單騎行村墅勸農桑以卓異擢同知去民建祠祀之馬雲從遼陽人隸正黃旗漢軍康熙三十四年知四川達州州境向苦瘠薄雲從時勸告民以裕生重

農之計值歲侵民鮮粒食雲從籌策告糴四境賴  
以全活州人感其恩立祠以祀

欽定盛京通志卷七十七

欽定四庫全書

欽定盛京通志卷七十八

國朝人物 十四

正白旗漢軍

正紅旗漢軍



欽定四庫全書

欽定盛京通志卷七十八

國朝人物十四

正白旗漢軍

石廷柱隸正白旗漢軍先世為遼東武弁父翰始  
家焉兄弟三人長國柱次天柱次即廷柱天命七  
年來歸國柱天柱俱積軍功至副將廷柱當

太祖初命在文館任事授三等輕車都尉世職十一年從

征囊努克取其屯寨晉三等男天聰三年率兵勦明故將毛文龍所屬諸島有俘獲四年收復漢兒莊率其城將士來謁五年圍大凌河城諭降祖大壽六年從征察哈爾七年隨攻旅順口以功晉三等子世職崇德九年

太宗御演武場以廷柱軍容整肅賚之二年以廷柱為漢軍左翼都統四年戰松山屢破敵兵六年陳取錦州策太宗嘉納之再圍松山乘夜破敵晉爵二等子七分漢



軍為八旗以廷柱為鑲紅旗都統順治元年從入  
關平定山東山西河南累以戰功加至一等伯十  
二年以鎮海將軍鎮京口戢和兵民百姓安堵有  
石佛之稱十四年乞休加少保兼太子太保致仕  
尋卒

賜祭葬謚忠勇子六人華善琳珍俱知名華善官至將軍  
防守鎮江歿後鎮江人思其德建祠立碑

華善子文炳仕至杭州副都統亦有政績

和濟格爾蒙古烏嚕特人隸正白旗漢軍天命七年大軍圍廣寧城偕守備石廷柱來歸授叅領十一年從征囊努克棟奎皆有功天聰三年偵明兵於薊州五年敗大凌河城援兵斷其樵採崇德三年從征明至山東屢戰皆捷五年擊破松山步兵杏山騎兵六年明總督洪承疇援錦州駐軍松山一再犯我師復自松山分踞高橋三臺和濟格爾力戰敗之七年攻克塔山杏山二城畧功授騎都

尉加一雲騎尉先是分漢軍為四旗以和濟格爾  
為鑲白旗副都統至是分為八旗改正白旗副都  
統遂為漢軍正白旗人八年從攻寧遠克中後所  
前屯衛二城順治元年晉世職為三等輕車都尉  
三年卒子巴圖襲

徐大貴隸正白旗漢軍初任佐領兼工部理事官  
崇德五年從圍錦州屢敗松山杏山援兵是時明  
總督洪承疇駐軍松山分兵踞高橋南三臺大貴

攻克之既而明兵千餘乘夜犯我營率所部力戰  
斬二十餘級七年從克塔山杏山二城授雲騎尉  
世職八年從克中後所前屯衛二城晉世職為騎  
都尉順治元年擢副都統從征山西定太原勦流  
賊李自成於延安大破之二年從豫親王多鐸平  
定河南江南晉三等輕車都尉三年遷刑部侍郎  
兼副都統如故七年駐防杭州九年偕平南將軍  
金礪勦閩賊鄭成功時成功踞海澄以衆三十餘

萬寇漳州大貴督兵進擊殲賊三萬餘遂攻海澄  
賊扼隘拒戰連破之晉世職至一等輕車都尉加  
一雲騎尉十二年晉爵三等男先是明魯王朱以  
海據舟山既敗走依成功成功乘其赴南澳遣人  
沉之海而其諸將阮思陳六御等願留為成功用  
及是思等引衆陷舟山大貴從大將軍伊勒德征  
之十三年進兵定海思等以戰艦二百餘迎戰敗  
之望江再敗之衡水洋思六御授首遂復舟山十

四年引疾乞休加太子少保致仕尋叙復舟山功  
晉爵二等男康熙十八年卒

賜祭葬謚勤果

馬國柱遼陽人隸正白旗漢軍天聰八年舉人入  
直內院崇德三年授都察院理事官順治元年巡  
撫山西時甫平大同忻代太原遂以次定汾州平  
陽潞安澤州胥安輯之而境內土賊蝨起乃馘閩  
汝龍於陽曲降高九英於嵐縣勦梁自雨李俊於

交城陽曲山西悉平擢宣大總督遷江南江西河南總督檄兵會侍郎鄂屯俘斬安慶土賊馮洪圖及其黨將懋修鍾武會江西總兵金聲桓據南昌叛賊將潘永禧突犯徽州遣官兵擊卻之復遣副將楊捷等克復都昌擒偽尚書余應柱乘勝趨武寧擊敗賊黨鄧雲龍等未幾廣東叛將李成棟犯贛州大破其衆而聲桓已為大軍所蹙赴水死江西悉平是時江北諸賊依山結寨詭以奉明宗室

名時出劫掠國柱遣副將朱運亨等擊英山賊陳  
元破之於三尖山檄總兵卜從善勦白雲梅家英  
窠諸寨偽石城王朱統錡糾賊五千餘由金紫寨  
赴援擊卻之乘勝連破賊寨擒偽總兵孔文燦偽  
副將方學達等復總兵會提督巴山張大猷勦六  
安州賊陣斬其渠張福窠候應龍降其黨王俊籍  
維倫等江北悉平先是偽國公張名振奉明魯王  
朱以海竄舟山偽侯吳凱踞大蘭山助之國柱寓



招凱凱與偽伯顧竒勲偽將軍姜君獻偽總兵陳  
德芝等來降名振勢遂孤蓋順治六年事也是年  
秋江南河南州縣雨雹傷稼請履勘蠲卹之復請  
改南京國子監為江寧府學並報可九年福建賊  
張自盛竄入江西大覺嚴檄提督劉光弼會閩兵  
合勦自盛就擒十一年名振由海道屢犯崇明劉  
河吳淞遣總兵王璟副將張思達等率水師分擊  
之連敗賊於靖江泰興燬其船名振遠遁入海尋

湖廣賊賴龍等犯江西國柱與湖廣總督祖澤遠  
會師搗其巢於桂東獲賴龍等斬之累加太子太  
保以年老致仕康熙三年二月卒

賜祭葬如例祀江南山西名宦

宜永貴遼陽人隸正白旗漢軍任佐領兼叅領崇  
德五年從圍錦州以礮攻克涼馬山等處六年復  
圍錦州戰松山克高橋南三臺七年以礮克塔山  
附近各臺及其城叙功授雲騎尉世職八年攻克

中後所前屯衛二城晉騎都尉順治元年任兵部  
理事官二年從征河南追敗於潼關又從征江南  
進克揚州破敵戰艦斬馘無算六年為臨清總兵  
大破土賊杜全張文齊等於朝城濮州皆授首九  
年任都統尋授倉場侍郎晉世職一等輕車都尉  
十一年授南贛巡撫攻偽都督許勝可兵於羅漢  
岩擒斬之十三年調福建會海寇鄭成功率衆猝  
犯福建薄城下時官兵俱赴漳泉德化永春守城

單弱永貴力疾登陴拒守乘間出城斬俘不可勝計賊鋒頓挫一月圍解康熙四年致仕尋卒

賜祭葬如例以追叙福州全城功加至三等男

蔡士英錦州人隸正白旗漢軍順治元年以佐領從入關勦山東土賊康玉環及招撫山西攻克太原皆有功三年隨征浙江定福建六年征叛鎮姜瓖復朔州及汾州府九年以右副都御史巡撫江西勦廣信土賊楊文吉安土賊劉京等悉平之士

英養請豁江西勘實荒田免逋賦五十八萬有奇  
免缺丁五十九萬有奇又請減瑞州浮糧十萬餘  
石袁州糧率每畝浮一斗六升有奇士英請減之  
視新喻九斗三合為定額以蘇積困疏上皆報可  
民甚德之十二年晉淮安漕運總督興利除弊遠  
近悅服晉兵部尚書康熙四年卒

賜祭葬謚襄敏祀江西淮安名宦所著有撫江集督漕奏

議

於時躍廣寧人隸正白旗漢軍順治二年任江南  
合肥令遷河南懷慶守擢分守河南道勦土賊劉  
芳等平之八年任陝西按察使聽斷明允案無積  
牘一時有於不落店之謠駐防兵擾民時躍一繩  
以法馭吏尤嚴所屬無敢受賕者十年巡撫廣西  
時李定國等擁朱由榔尚盤據雲貴朱盛濃等應  
之時躍至斬賊無算陣擒盛濃十四年孫可望降  
定國竄入雲南南寧太平等六郡尚為賊黨所據

時躍籌兵畫餉親督師進勦六郡以平十八年擢  
廣西總督偽德陽王朱至濬竄入安南時躍遣使  
招撫至濬等投城加都察院右都御史康熙二年  
卒於官

賜祭葬如例祀廣西名宦

夏一鶚奉天人隸正白旗漢軍順治三年知江南  
常州府時山湖藪澤尚多伏莽一鶚悉心勞來威  
惠並著盜賊皆為良民尋轉江寧知府及江西分

守道八年授江西巡撫江右境土初定政多穢濁  
土地荒蕪一鶚叅劾貪吏二十餘員吏治澄肅請  
釐錢糧戶口招集流亡開墾荒地給還官產安插  
明朝廢冢期年政務具舉明翰林傅鼎銓等受偽  
職聚衆為亂往來福建江西一鶚調兵分路夾擊  
追至福建斬級萬餘生擒鼎銓并偽總兵楊起龍  
等又九仙山賊首陳九思宜黃賊首曾明等負固  
山寨出沒為寇一鶚勦撫兼用分地設防賊黨先



後就戮境土悉安嗣卒康熙十七年崇祀江西名  
宦祠

閔三元隸正白旗漢軍世居錦州順治初隨入關  
五年授河南鹿邑令為人廉明有才畧時邑新墾  
糧多詭寄力為釐正由是賦役均而國課增官署  
學宮皆毀於兵燹三元一一創立規度稍備鹿邑  
自黃水氾濫後舊溝淤壞三元徧閱境內相其高  
下詢覽舊蹟共開渠增培使潴水之區悉達於河

邑北枕渦河為患三元增築堤防俾永無衝決在任五年百廢具舉及去任士民道遮攀留立碑以記卒祀名宦

金培生奉天人隸正白旗漢軍順治初任陝之潼關道時關中寇亂初定民未安集草竊乘時間發培生築城浚隍興教化勵風俗嚴保甲勸開墾著有治績及卒入祀名宦

王宗聖奉天人隸正白旗漢軍順治中知江南之

舒城令詳慎明決吏不敢欺而獄無枉縱案無積  
滯邑當兵燹後安輯流亡惠威並著吏民咸深感  
戴卒祀本邑名宦

遲日巽廣寧人隸正白旂漢軍順治七年知山西  
解州之夏縣時叛鎮姜瓖餘孽猶潛伏山林日巽  
練鄉勇躬往督戰殄之脅從者赦之俾得復業又  
力請蠲積逋減役省徭夏人始蘇

崔宗人奉天人隸正白旂漢軍順治十二年知江

南常州府惠貧弱抑豪強發摘奸伏吏民驚若神  
明十三年大軍征閩駐郡時有遊騎逐婦女二人  
溺死宗泰即白諸將軍按法治之麾下肅然民得  
安堵卒祀名宦

石文晟奉天人隸正白旗漢軍康熙中知山西平  
陽府時歲饑方有造船運米役上官又令民輸草  
三十五萬束於大同文晟請就近收買罷之又言  
賑饑煮粥止便少壯能就食者老病婦孺且坐斃

請散賑官親歷山僻安戶給之全活無算康熙三十三年巡撫雲南豁達多才畧為政務舉大綱先是雲南七賦仍前明舊額科重賦繁軍民病之又歲疏請減十之六又請增鄉試解額以振起人文士民無不敢戴及調廣東巡撫尤多惠政粵人思其德祀名宦

于翔漢奉天人隸正白旗漢軍康熙十三年知陝之隴州先是逆藩吳三桂遣偽將軍元攻隴州前

官翁世庸被報城陷未幾大軍克復隴州賊西遁  
復遠踞關山頂塞路守險總督哈占等卒兵屯咸  
宜關相持不下翔漢供億彌年人民安堵擢鳳翔  
知府休養瘡痍人賴以安

蔡敏榮士英子隸正白旗漢軍康熙十九年授綏  
遠將軍同諸軍恢復雲南賊平後改授雲貴總督  
時逆氛初靖流離載途敏榮招撫散亡給牛種勸  
耕作流民漸復業奏上籌滇十疏設施各有條理

滇人德之

余三級隸正白旗漢軍世居遼東初任湖北黃州府同知轉武昌守秉公持正修舉百務才能肆應事集而民不病厯任山東按察使允廉明平允不徇情不枉斷及轉廣東布政使清操彌著公署中饘粥宴如也卒祀湖廣名宦

蔡毓秀奉天人隸正白旗漢軍康熙十六年知浙之奉化縣值歲暮鄉民以逋課治獄者數十人悉

放還家約以新正完課民感泣如約邑有盜魁二  
人行劫橫州里毓秀擒磔於市積匪斂迹請免運  
衆役兵米民累得甦輿誦德之

遲維坤廣寧人隸正白旗漢軍康熙十九年知山  
東聊城縣寬嚴皆中節公暇即詣隴畝勸民力作  
兼諮訪時事長幼皆得盡言故所興革皆切中利  
弊闔邑大治尋卒於官祀名宦

楊宗仁奉天人隸正白旗漢軍康熙中由甘肅階



州知州遷臨洮同知監蘭州鎮遠橋商稅正額外  
一無羨餘值歲歛請發倉賑饑減稅額招流亡上  
官有疑獄輒付宗仁一訊即決郡多盜有老爪賊  
尤為民害因歎他獄得百餘案皆窮治捕置諸法  
盜風頓息

滕天綬遼陽人隸正白旗漢軍康熙二十五年知  
陝之漢中府練達精敏公廷清暇嘗言政以富教  
為本爰修復廟學倉廩俾民知務本漢南素繞水

利天綬相視地形築堤建閘啟閉有期蓄洩有界  
自是爭端永杜灌溉之利垂諸永久卒祀漢中府  
名宦

董學詩遼陽隸正白旗漢軍康熙二十六年知山  
西懷仁縣年少精敏待士撫民咸得治體在任三  
年治行為當時最

劉民瞻隸正白旗漢軍康熙二十八年知山西沁  
州值歲荒設法賑救全活無算陞平陽府同知累

陞至直隸正定知府并著賢聲後崇祀沁州名宦  
羅文瑜隸正白旂漢軍世居廣寧順治乙未進士  
授山東曹縣令弱寇蒞任即能發奸摘伏奸宄潛  
踪待士和而有禮御下寬而不縱時丈量官地立  
法詳密弊清而人不擾尋擢濟南守卒祀曹縣名  
宦

羅文現隸正白旂漢軍世居廣寧康熙三十五年  
擢汝南道勵士習勸耕農招墾荒地飭嚴保甲盜

息民安聽訟詳慎鋤強除暴每冬月捐俸施粥全  
活無算崇祀名宦

白璧琛奉天人隸正白旗漢軍康熙五十一年擢  
粵之廣南韶道墨吏望風引遁江灣向為奸藪璧  
琛至任設法勦滅之西山猺獍相鬪單騎歷險諭  
降之歲朝禱雨輒應轉荒為豐民咸頌之

正紅旗漢軍

甯亮我隸正紅旗漢軍世居遼陽天命初來歸事

貝勒薩哈璘以兼通蒙古漢文任事文館天聰四年偕達海招諭永平從征大凌河撫諭察哈彌部以功授騎都尉世職六年與范文程馬國柱等疏陳伐明之策

太宗嘉納尋以好博革世職閒居數年順治元年起用為學士二年擢內院大學士六年修

太宗實錄允總裁官加二等輕車都尉晉議政大臣三十三年加少傅兼太子太保十五年致仕康熙元年

聖祖念其贊理機務年久

命擢其子為內院學士四年卒

賜祭葬立碑墓道謚文毅雍正八年

詔入祀賢良祠

郎賽隸正紅旂漢軍世居開原鐵嶺本姓劉天命

元年來歸四年

太祖取明撫順郎賽從著勲伐六年從取明瀋陽在事有

功崇德七年漢軍分隸八旗郎賽始隸正紅旂尋

管佐領八年隨征明寧遠拔中後所前屯衛敗遊  
繫吳良弼等斬總兵李輔明等十二月隨征黑龍  
江俘獲甚衆順治元年隨入關破賊將唐通於一  
片石嗣追流賊至潼關率衆前驅大破之二年抵  
揚州克其城尋破江陰等郡叙功累加世職至一  
等輕車都尉十三年擢為寧海將軍鎮守福建十  
六年海寇鄭成功率率兵犯鎮江

朝廷遣禁旅至福建會同郎賽由廈門進勦禁旅因風

失利事連郎賽並逮問削爵康熙八年事白復職  
十年卒

吳守進隸正紅旂漢軍初事

太祖以功授叅將世職天聰五年七月初設六部以守進  
為戶部承政嗣晉佐領崇德三年更官制授戶部  
佐叅政四年緣事革世職六年隨圍錦州以巨礮  
克塔山四臺斬馘甚衆七年擢都統敗明松山杏  
山兵復擊明呂翁山兵敗之又追敵入杏山拔其



城順治元年從平山西攻太原克之二年南征敗明太監高起潛軍於洋子江獲其船艦從攻揚州嘉興及江陰皆有功四年累加世職至一等叅領充定西將軍五年卒子國柄國正皆以功名顯

吳世俊隸正紅旗漢軍世居開元初以佐領兼叅領崇德五年大軍圍明錦州世俊發巨礮克取馬家湖臺六年復圍錦州偕都統金礮敗明兵於呂翁山口七年攻塔山杏山毀其城八年隨鄭親王

濟爾哈朗攻寧遠克前屯衛中後所二城順治元年隨都統葉臣招撫山西時流賊李自成遁陝西其偽伯陳永福猶據太原世俊與諸將攻克其城山西既定還兵擊鮑家莊賊殲之復隨英親王阿濟格追勦自成于陝西自成遁走湖廣三年隨端重親王博洛定浙江敗偽閣部朱大興與金華破其城大興自焚死餘黨悉平是年擢都察院左副都御史六年授正紅旗漢軍副都統屢以功叙復

三遇

恩詔晉爵至三等男十年以疾致仕十八年卒

賜祭葬如例子延祚襲

王國光漢軍正紅旗人天命初隨父一屏來歸年十四勇敢善戰初任佐領兼戶部理事官崇德中累遷副都統兼戶部叅政八年隨鄭親王濟爾哈朗攻寧遠克前屯衛中後所二城順治元年改六部叅政曰侍郎國光仍任戶部三年隨定西大將

軍和洛會駐防西安擊敗興安賊孫守法胡向宸  
又敗其黨歐文炳等進搗賊巢拔之五年擢都統  
六年隨英親王阿濟格征大同叛鎮姜瓖攻克佐  
衛朔州汾州太谷四城十年隨定遠大將軍貝勒  
屯齊征湖廣擊敗偽晉王李定國于永州又敗偽  
秦王孫可望于岔路口多所斬獲十二年海賊鄭  
成功張名振犯浙江偕寧海大將軍伊勒德往征  
之敗其衆於舟山成功等遁入海十三年授兩廣

總督加太子太保國光廉明果斷時西逆未靖土  
寇充斥國光嚴詰盜賊立連坐保甲承審之法十  
五年以疾還京十八年授鎮海將軍駐防潮州康  
熙三年會平南王尚可喜合兵勦碣石叛將蘇利  
進師燈籠山蘇利乘我軍未成列率衆萬餘突來  
搏戰我軍左右夾擊賊衆潰遁追薄碣石衛城四  
面環攻拔之擒斬蘇利及偽總兵陳英偽副將李  
慧等餘黨竄匿山谷國光督兵搜捕之偽總兵鄭

盛窮蹙自縊死賊遂平五年還京復任都統先後  
叙功復遇

恩詔晉爵一等男八年以老致仕九年卒

賜祭葬如例謚襄壯

王國詔國光弟天聰四年大軍征明國詔年十六  
即從征克永平五年從征大凌河崇德元年從征  
朝鮮攻納摩山被重創得賞叙八年從攻明前屯  
衛被創順治元年從征山西克潞安追流寇至湖

廣三年隨征湖南有功六年征大同叛鎮姜瓖取朔州叙功授佐領累陞至都統康熙十三年乞休逆藩吳三桂反國詔隨征至湖廣以疾卒

賜祭葬加典禮

李國英奉天人隸正紅旗漢軍順治三年從肅親王豪格定蜀殲張獻忠大軍凱旋留國英鎮保順間勦平餘賊代王遵坦為巡撫治兵閬中軍旅之後饑疫頻仍國英勸農桑備戰守禮賢興學士民

始復業五年賊黨譚洪犯保寧擊敗之王命臣等  
據順慶國英分兵三路進殲其衆追抵潼川遂定  
龍安綿達等州縣六年擒斬謝光祖等九年孫可  
望劉文秀逼閬中漢沔宸動國英擊破之十四年  
以兵部尚書總督川陝大興屯田以牛種數萬給  
墾者軍儲以足駐節所在與士卒同甘苦俸糈所  
入盡供餉士用康熙元年奉

詔帥湖廣陝西河南四川四省會兵勦茅麓山賊李來亨



袁宗第等國英師次夔府伐榛莽開道以進遂奪  
羊耳山敗宗第於茶園坪追及巫山據其城宗第  
又合郝永忠劉體純引衆數萬來攻我兵出戰體  
純潰自殺乘勝追至黃草坪永忠宗第以次授首  
遂進兵圍來亨於茅麓山來亨窮蹙焚妻子自經  
死寇孽悉平國英鎮蜀凡二十有二年以勞卒於  
官

賜祭葬謚勤襄追敘勦賊功晉二等男雍正十年入祠賢

良祠

線國安遼東人隸正紅旗漢軍崇德元年隨孔有德航海歸誠從征海外各島及克服朝鮮皆在事有功順治元年隨大軍入關追勦流賊李自成於潼關破金溝寨復從征江南克揚州以兵先渡揚子江克江陰四年隨征湖南取衡山六年授總兵官復隨攻湖南多所擒獲招安反側官兵六七萬人隨進取廣西之桂林柳州功最隨征南寧七年

李廷國犯桂林提師赴援定國遁去九年授提督  
十年李廷國擁衆數萬復犯桂林國安與陳維新  
計敗之遂平定全粵十一年復永寧州叙功加太  
子少保征蠻將軍順治十二年叙恢復桂林功授  
三等伯世襲十五年隨進取滇黔戰李定國於涼  
水井賊殺五千有餘復戰於水寨山口殺賊萬計  
十八年授都統康熙五年因老乞休十四年卒國  
安性廉介二十餘年清操如一人咸以為難

蘇宏祖隸正紅旗漢軍崇德三年直內院授啟心  
郎八年考滿加世職順治十一年擢福建興泉道  
捍寇修城設倉濟民頗著功績十五年巡撫南贛  
時巨寇李玉廷剽掠雩都降而復叛者再宏祖遣  
將擒之戮於市嶺北平與民休息以振興文教為  
已任卒祀福建江西名宦

孫德盛隸正紅旗漢軍初任佐領崇德八年從征  
明寧遠拔前屯衛中後所順治元年隨南征破流

賊平河南江南有功三年加佐領世職四年擢西  
安副都統加世職至輕車都尉

孫茂蘭遼陽人隸正紅旗漢軍順治二年任直隸  
翼州牧再任霸昌道有惠政四年任山西布政使  
先是駐防滿兵圈種民地以廢藩土田給之屯丁  
豪霸者抗不輸租茂蘭重法繩之民不失業或軍  
民相構訟者質成必準情理九年擢陝西寧夏巡撫  
尋休致晉人思其德崇祀名宦祠

徐永順隸正紅旗漢軍世居遼東順治六年任天津道時官兵勦靜海土賊獨天津境內無賊烽火不驚百姓安堵累擢至福建巡撫卒後天津人思其德崇祀名宦祠

吳興祚清河人隸正紅旗漢軍順治十二年知大寧縣縣界萬山中經流寇蹂躪後四境凋弊民多轉徙學宮鞠為茂草興祚招民勸墾興學養士不再期民復舊業寢聞弦誦聲康熙二年任無錫令

邑最號繁劇前任多以罪廢數十年無遷擢者興祚至尚有前令數人虧空未完纍纍追繫興祚慨然曰彼囊空如洗拘之何益寧為代賠俾得歸鄉井耳因設祖席延數令至告以代完諸公可即作歸計前令皆感激去在任數年以治行報最十五年廷推特擢福建按察使以計擒土賊朱統錫十七年陞巡撫加兵部尚書以兵擊破海賊劉國軒于赤澳等處焚其船興祚在任首薦臬司永寧于

成龍世號知人時海氛未靖興祚留意戎行識拔  
將材總督標下監理過誤將行興祚知其忠勇可  
用緩煩為開生路後可以拖塲大戰蒙

聖祖獎賚優擢顯職理感舊恩繪興祚像奉之姚啟聖平  
海壇興祚與之協謀取金門廈門叙功加騎都尉  
又一雲騎尉世襲二十年調兩廣總督屢上疏言  
撫粵事宜皆中利獎三十一年授歸化城右翼漢  
軍副都統三十六年從征噶爾丹卒于軍興祚素



善書精詩律所著有宋元聲律選及史遷句解行世

許世昌遼東人隸正紅旗漢軍順治十四年巡按江西興利除弊廉平不苛冤獄多所平反康熙元年巡撫福建先是海寇陸梁沿海諸郡制造戰船火炮世昌慮部議核減浮價勢必分派民間遂具疏立請准銷又請代完紳衿逋負免其解部究追又請蠲順治十三年以前牛角等稅加價一十餘

萬免民屯久荒田糧六十餘萬又給遷界窮民牛  
種勸令開墾復捐俸委官于七門及近郊各處賑  
粥施藥以濟遷民之饑疫者時有萬姓饑病仁天  
活命之謠

劉秉權遼東人隸正紅旗漢軍初授國史院學士  
康熙七年巡撫廣東懲貪墨禁苛派草供應風紀  
肅然時方巡海展界秉權安插男女十六萬有奇  
墾田二萬五千餘頃至復甯丁而鹽課足減七賦

而戊卒安重師儒崇禮學而文風振皆治績之最  
著者歲甲寅潮州鎮劉進忠叛秉權親赴潮帥師  
斬偽將金統挫其鋒勤謀勦撫以積勞卒於官

汪世臣奉天正正紅旗漢軍以廕襲世職順治  
十六年隨征湖北累著戰功駐防潮州時蘇利犯  
順世臣隨將軍王國光與賊戰於石井寨親冒矢  
石戰方酣又以奇兵繞出賊營勝之降其餘衆潮  
郡悉平尋擢廣東副都統在粵三十餘年訓練嚴

明地方寧輯以疾終祀名宦

王永譽國光子康熙十三年授河南提督時河北  
鎮察祿叛應吳三桂遣禁旅勦賊於懷慶永譽由  
孟津渡河為犄角勢兵至擒之不煩血刃嚴戒部  
伍閭里晏然尋調安慶提督逆藩耿精忠遣偽都  
督宋標等陷江西饒州犯徽州十四年永譽進師  
擒宋標磔之十七年改江南提督十九年遷廣東  
將軍三十五年

聖祖親征噶爾丹永譽統正黃正紅兩旗由中路進噶爾丹遁永譽督兵追躡偵賊遠竄乃還四十三年卒  
祀河南名宦

李芳春蓋平人隸正紅旗漢軍順治五年知直隸慶雲縣邑當殘破之餘芳春年少賊甚易之屢出滋擾芳春乃與協鎮郭天培等密謀勦捕前後擒賊等二千餘人訓練鄉民皆知守禦賊相戒不敢入境

劉德芳遼陽人隸正紅旗漢軍初任山東東昌守  
勤於政事勸課農桑優禮齒德民情向化值歲旱  
德芳步禱輒應卒至豐稔康熙四十三年擢四川  
按察使猷決平允時打箭爐甫定茶鹽權課壅遏  
不行德芳籌畫盡善歲無停滯民思其德嘗葺文  
翁石室為錦江書院蜀之人士欣然向學卒祀山  
東四川名宦

孟希舜奉天人隸正紅旗漢軍順治八年知江南

之廣德州請免州縣地畝溢額銀六千七百餘兩  
歲旱勘災申豁秋糧十分之一民賴以安其居官  
以愛民為本一時有杜母之譽

董宏毅奉天人隸正紅旗漢軍康熙中知江西奉  
新縣時耿精忠煽亂以兵逼城宏毅率官兵捍禦  
手斬為內應者發矢先斃其偽左將軍生擒六人  
賊潰城賴以全明年賊萬餘踞城北獅山礮石雨  
下宏毅殲其前鋒又斬賊于邑之棉花地賊眾悉

平邑遭亂後丁缺田荒為繪圖申請減賦之半在職四載勤勞奉公

王之紀鄱陽人隸正紅旗漢軍康熙十六年知福建之德化縣時逆寇初平瘡痍未起之紀簡靜鎮撫不事紛更清理訟獄減省興作政舉民安及去任士民攀轅乞留卒祀名宦

王毓奇奉天人隸正紅旗漢軍康熙三十二年知四川之瀘州除耗羨嚴保甲勸耕織盜賊斂避民



安其業比戶有豐寧之慶其歿也州人祠之

王臣隸正紅旗漢軍父國泰別見忠節傳臣以廕  
初任廣東駐防協領康熙三十九年擢湖廣永州  
總兵整飭戎行撫卹士卒廉介自矢不受餽遺永  
州頻年遭火加以大水四十四年州又大旱臣隨  
時設法救民無算尋卒永人思其德崇祀名宦

欽定盛京通志卷七十八